

Feihyiz Bouxcuengh:

Cingsih Fouxvunzdaemq Gyangnaz

壮族非遗：靖西田间矮人舞

□ Cau Fuzbo sij Veiz Yinyiz hoiz



▲ Fouxvunzdaemq youq gwnz daizheiq biujyienj.

◀ Cingsih Bouxcuengh fouxvunzdaemq yinx gyoengq-vunz humxyawj.



▲ Fouxvunzdaemq aeu naz guh daizfoux.



▲ Baizlienx fouxvunzdaemq.



▲ Bouxcangh fouxvunzdaemq youq gwnz naengdungx veh "naj vunzdaema".



▲ Vunzdaemq "doxdaeuq" mizyinx lai.

Gangj hwnj foux ndawbiengz, couh miz haujlai vunz doiq Gvangjsih Cingsih fouxvunzdaemq gyangnaz miz cungj daegbied gamjcingz gyaemaij ndeu, doiq de danghaenh dangqmaz. Fouxvunzdaemq gyangnaz Bouxcuengh Cingsih yienzbonj daj ndawbiengz Cingsih miz daeuj. Daj ciuhgeq daeuj, fouxvunzdaemq cungj dwg cungj foux ndawbiengz Cingsih ndeu, dwg Bouxcuengh dangdeih dangguh cungj foux angqhoh gouz fuk ndeu, gyoengq Bouxcuengh gyaemaij dangqmaz.

Cingsih Bouxcuengh fouxvunzdaemq gyangnaz dwg Cingsih Si cungj foux ndawbiengz miz daiq-biujsingq ndeu, miz minzcuz daegsaek ronghsien、biujyienj hingzik sengdoengh、yisuz funghgwz cingh-seuq caeuq vwnzva goekdaej laegna cungj daegdiemj neix, cujyau riuz-cienz youq mbiengj Cingsih Andwz Gujcouh, daengz seizneix gaenq miz 900 lai bi lizsij.

Fouxvunzdaemq gyangnaz dwg cungj foux ndawbiengz "ndang-daenj——doenghgaik——dungcoz——go" seiq yiengh cungj miz

caemhcaiq habdangq doengjit ndeu. Moix bi seizcou, youq seiz guh hongnaz miz hoengq haenx, bouxsai Bouxcuengh duet gij buh lamh youq gyang hwet, yungh gij namh ndaem、hoengz faenbied duz youq gwnz naengdungx, veh ok bwncaez、da、naengbak caeuq linx bouxvunz, ciepdwk aeu loz faexcuk goeb youq gwnz gyaem, mbe hai song gen, aeu naengdungx guh najvunz、aeu loz faexcuk gwnzgyaem guh mauh、aeu gen guh mengq, gij yiengh "vunz-daemq" couh caux baenz lo. Mehmbwk cix yungh vengq buh faexcuk goeb naj、daenj gyaep, hwet cug ginzfiengz, ciuqguh gij "vunz-fiengz" gyangnaz. Cauxveh baenz gij "vunzdaemq" yienjok yiengh manz youh dwgriu, boux diuqfoux doxnyex doxaemz, caenhcingz angq diuq, angqhoh fungsou.

Fouxvunzdaemq cujyau dungcoz miz "yo ga doxdaeuq"、"gingz caekhaex doxbungq"、"ngaemgyaem doxdingi" daengj, linghvaih lij doenggvaq diemheiq bienqvuenh gaemhanh naengdungx, dawzdaemq funghfu gij biujcingz "fajnaj" "vunz-daemq"; "vunzfiengz" couh fwngz gaem duk faexcuk dop daj, boiqhab gij cezcou dungcoz "vunzdaemq" ciengq diuh'iq dangdeih. Yienh-ciengz faenhveiz vuenheiq angqyangz. Cungj foux neix miz ndawbiengz deihfueng daegsaek funghgwz,

ndeiriuz mizyinx.

Gawq liujgaij, fouxvunzdaemq dwg cungj foux doj deihfueng ndeu, de dwg vunz Bouxcuengh soundaej liux le gij simcingz biujyienj, bouxsai youq gwnz naengdungx veh najvunz, miz angqyangz hozhwnj siengsim vuenyungz daengj biujcingz, gizyawz bouxsai mehmbwk gak daiq gaiq goebnaj, humx boux gyaem dingj aenloz haenx, guhcaemz dajnauh, biujdap gij simcingz fungsou angqyangz. Yienznaeuz mbouj miz giyi hamzlienx sang, hoeng miz gij gyaemndei ciuhnduj, yinx vunz miz yinxdaemz dangqmaz.

Boux biujyienj fouxvunzdaemq haenx, itbuen cungj dwg bouxguhnaz Bouxcuengh dangdeih. Gij biujyienj gyoengqde, cienz dwg daj ndaw saedcej daeuj, mboujlwnh dwg biujyienh vaiz cae naz nauh ndaemcin、guhmoiz doxaen coux bawxmoq roxnaeuz gouz fwnraemx cuk, cungj miz gij heiqsik saedcej gwd dangq-maz, gyoengqde yungh gaeuvaiz、hozloz、gaen faexcuk、doengz faexcuk、ndok vaiz gag guh baenz yozgi, guh goebnaj caeuq doenghyienh doenghduz, biujyienh ok gij caiz-naengz sawj vunz geizheih. Gyoengqde cungj mbouj dwg cienmonz guh, gyangngoenz lijau guh hongnaz hongreih, hoeng rox dawz gij saedcej yisuzva baenz yienghneix, gangjmingz yisuz dwg daj saedcej daeuj youh maj youq ndaw saedcej, saedcej gaenx beksingq ceiq miz yingzyangj, gij vwnzva miz gaen miz meg rengzmingh fouzhanh.

Mboengqneix, Cingsih Si gyavaiq cienzswnj caeuq fazcanj yisuz ndawbiengz, dawz fouxvunzdaemq hwnj daizheiq bae, aeundaem fanjyienj giengzlied. Bi 2005 doenggvaq gaenxmaenx sinhbau, Gingsih fouxvunzdaemq gyangnaz gaenq ndaej senj haeuj swcigih gaep feihvuzciz vwnzva yizcanj mingzloeg.



▲ "Naj vunzdaemq" riengz foux lingzhoz fouxdoengh.



▲ Youq gwnz daizheiq daeuq foux.